

UZROČNICI SNAGE U ŽIVOTU MUSLIMANA

Zahvala pripada Allahu, dž.š. Njega hvalimo i od Njega pomoć i oprost molimo. Utičemo se Allahu da nas zaštiti od zla naših duša i naših zlih djela. Koga Allah uputi na pravi put, niko ga u zabludu ne može odvesti, a koga Allah na stranputici ostavi, niko mu na pravi put ne može ukazati. Svjedočim da nema drugog boga sem Allaha, dž.š., i da je Muhammed, s.a.v.s., Njegov rob i poslanik.

Draga braćo i cijenjene sestre u islamu!

Naše osnovno učenje nas upućuje da se ponosimo svojom vjerom, da se osjećamo počašćeni što nas je Uzvišeni Allah učinio muslimanima. Onaj ko ne osjeća ponos u svom srcu što je musliman on ima puno sumnji i slabu vjeru. Kaže Uzvišeni: **"Kur'an je, doista, čast tebi i narodu tvome, odgovarat ćete vi."** (Zuhruf, 44.)

Da, čast tebi, o Muhammede, tvome narodu i svim onima koji te budu slijedili do Sudnjega dana. Zato brate i sestro, budite ponosni i počašćeni što ste pripadnici islama i sljedbenici Kur'ana.

"I ne gubite hrabrost i ne žalostite se, vi ćete pobijediti ako budete pravi vjernici." (Al 'Imran, 139.)

Prof. Sejjid Kutb tumačeći ovaj ajet kaže: "Vi ste najbolji porijeklom i programom. Porijeklo je od Allaha a program je Kur'an Uzvišeni, pa kako može biti poražen onaj kome je Uzvišeni Allah osnova, kome je On Gospodar? Kako može biti poražen onaj kome je poslanik, vođa i uzor, Muhammed, s.a.v.s.? Kako može biti poražen onaj kome je vjera islam? Moramo biti ponosni što smo pripadnici islama i sljedbenici Poslanika, s.a.v.s. Onaj ko se stidi toga, ko se stidi prihvatiti i slijediti Sunnet Resulullaha, taj puno griješi i doživljava veliki duhovni poraz."

Mnogi danas misle da je zapad uzor. Kapital i tehnološki napredak. Pogledajte šta Uzvišeni kaže odgovarajući onima koji misle da su ovosvjetska dobra uslov za postizanje pobjede i veličine:

"I još kažu: -Trebalo je da ovaj Kur'an bude objavljen nekom uglednom čovjeku iz jednog od ova dva grada. Zar oni da raspoređuju milost Gospodara tvoga? Mi im dajemo sve što im je potrebno za život na ovom svijetu i Mi jedne nad drugima uzdižemo po nekoliko

stepeni da bi jedni druge služili. A milost Gospodara tvoga bolja je od onoga što oni gomilaju." (Zuhruf, 31, 32).

Ugled i čast nisu u novcu, dvorima, djeci, firmi. Ugled i čast se postižu robovanjem Gospodaru nebesa i Zemlje. Ugled i čast je da budeš jedan od evlija, Allahu bliskih robova, koji rade dobra djela a klone se nevaljalih.

Došao je Abdullah b. Ummi Mektum, siromašak, Poslaniku, s.a.v.s., da ga upita neke stvari. Poslanik, s.a.v.s., je bio opsjednut razgovorom sa prvacima plemena Kurejš želeći da ih uputi na pravi put. Kada je ušao, rekao je: "Allahov poslaniče, želim to i to." Poslanik, s.a.v.s., se okrenuo od njega ne želeći da propusti priliku koju je imao sa Kurejšijama i zbog toga biva ukoren od strane svoga Gospodara:

On se namrštio i okrenuo

zato što je slijepac njemu prišao

A šta ti znaš, možda on želi da se očisti,

- da upozna vjeru i čisto znanje, da ga vodiš prema Gospodaru svjetova.

ili da se pouči pa da mu pouka bude od koristi

onoga koji je bogat

ti njega savjetuješ,

- onoga koji odbija Kur'an i Sunnet, uputu i svjetlost, ti sa njim lijepo razgovaraš i pažljiv si, a sa slijepcem tako postupaš???

a ti nisi kriv ako on neće da vjeruje,

- pusti ga neka umre u svom nevjerstvu, inatu, vatra će mu boravište biti. a onoga koji ti žureći prilazi i strah osjeća, ti se na njega ne osvrćeš.

Došao je Abdullah drugi put, pa je Allahov poslanik, s.a.v.s., ustao i lijepo ga dočekao, prostro mu svoj ogrtač da na njega sjedne, i rekao mu: "Dobro došao onaj zbog koga me ukorio moj Gospodar."

I doista, prvaci kurejšija su pomrli kao éafiri, nevjernici, i ušli u vatru, a Abdullah b. Ummi Mektum je primio islam i bio i ostao na tom putu do smrti.

U doba drugog halife, Omera, r.a., islamska država se brzo širila, džihad i Allahova vjera su došli do punog izražaja. Oglasio se poziv u džihad na Kadisijju protiv porodice Kisre i Rustema. Abdullah se prijavio, a ashabi su ga odgovarali zato što je imao opravdanje, svoje

sljepilo. On je bio ustrajan, pa je rekao: " Ne, tako mi Allaha, jer kaže Uzvišeni:

"Krećite u boj, bili slabi ili snažni, i borite se na Allahovu putu zalažući imetke svoje i živote svoje! To vam je, da znate, bolje!" (Tewbe, 41)

On je u toku borbe nosio zastavu sve dok nije pao kao šehid. Neka je Allahov mir i spas na ovog iskrenog Allahovog roba.

Kada vidimo i upoznemo osobu koja je iskreni vjernik, zavolimo je i osjećamo međusobnu bliskost. Kada vidimo nevjernika, ma kako lijepo izgledao, na njemu se ogleda odvratnost zato što se okrenuo od Allaha, dž.š., i pravog puta. Aiša r.a. pripovijeda:

"Allahovom poslaniku se ništa nije dopadalo niti sviđalo od ovog svijeta ukoliko u sebi nije imalo bogobojažnosti."

Kaže Uzvišeni:

"Kada ih pogledaš, njihov izgled te ushićuje, a kad progovore, ti slušaš riječi njihove, - međutim, oni su kao šuplji naslonjeni balvani, i misle da je svaki povik protiv njih. Oni su pravi neprijatelji, pa ih se pričuvaj! Allah ih ubio, kuda se odmeću?!" (Munafikun, 4)

Tijelo može biti visoko i lijepo, ali ako je srce na stranputici i u neznanju, onda je bezvrijedno. Ashabi nisu posjedovali puno od ovoga svijeta, ali su posjedovali jaku vjeru u svojim srcima, a Allah gleda u srca, te ih je uputio u islam.

Oni koji posjeduju puno ovosvjetskog imetka, to im nije garant da će ih Allah, dž.š., Uputiti.

"Da Allah zna da od njih može biti ikakva dobra, učinio bi da čuju, a da je učinio i da čuju, oni bi se opet okrenuli, jer oni i inače glave okreću." (Enfal, 23)

Došao je Džulejbib, r.a., Poslaniku, s.a.v.s. Kada ga je ugledao, nasmiješio mu se i upitao ga: " O Džulejbib, želiš li se oženiti?" "Ko će se udati za mene, nemam porodice, ni kuće, ni imetka, ni ništa?" Na to mu je Poslanik, s.a.v.s., rekao: "Otidi kod tog i tog ensarije, prenesi mu od mene selam i reci mu: - Doista vam Poslanik, s.a.v.s., naređuje da me oženite. Otišao je i pokucao na vrata ljudima koji su spadali u imućnije i uglednije ensarske porodice. Izašao je

gazda kuće, ugledavši Džulejbiba, siromaška, upitao ga je: - Šta želiš? Obavijestio ga je o onome zbog čega je došao. On se posavjetova sa svojom ženom i rekoše: - Da je Bogdo neko drugi, a ne Džulejbib, nema ni porodice, ni imetka, ni kuće. Upitali su svoju čestitu kćer koja je odgojena u čistoj vjeri, a ona odgovori: - Zar da odbijemo Allahova Poslanika, s.a.v.s.? Oženio se njom i živio u kući utemeljenoj na bogobožnosti i Allahovom zadovoljstvu, smirenost i sigurnost je vladala, veličanje i slavljenje Allaha, dž.š., je uljepšavalo ambijent, a hladovinu je pružao namaz i post.

Nakon jedne od bitaka u kojoj su muslimani izvojevali pobjedu, Poslanik, s.a.v.s., je upitao prisutne ashabe: - Ima li ko da vam nedostaje? Odgovorili su: - Da, taj, taj i taj. Potom je ponovo upitao: - Ima li ko da vam nedostaje? Odgovorili su: - Da, taj, taj i taj. Zatim je ponovo upitao: - Ima li ko da vam nedostaje? Odgovorili su: - Ne. Zatim je Poslanik, s.a.v.s., rekao: - Nema mi Džulejbiba, tražite ga! Pronađen je među poginulim a pored njega je bilo sedam mrtvih koje je on ubio prije nego su njega ubili. Došao je do njega Poslanik, s.a.v.s., i stao pored njega i rekao: - Ubio je sedmoricu a potom su ga ubili. On je od mene i ja sam od njega, on je od mene i ja sam od njega. Zatim ga je položio sebi na krilo dok nije iskopan kabur u koji je stavljen.

(Muslim)

Omer, r.a., prilikom pohoda radi preuzimanja ključeva Kuds, rekao je poznatu rečenicu: - Mi smo narod koji je Allah uzdigao islamom. Kada god smo tražili veličinu mimo islama, Allah nas je ponizio.

Predstavnik muslimana koji je obavio dijalog sa Rustemom, vizantijskim vojskovođom, koji je imao 280 000 vojnika, na pitanje šta se to desilo sa arapima koji su bez kulture, nomadi koji se seljakaju sa svojom stokom, za razliku od rimljana, grka, hindusa, vizantijaca koji su imali uticaj i kulturu odavno, odgovorio je: - Da, kralju, bili smo gori nego si spomenuo. Bili smo neznalice, obožavali smo kipove, međusobno se ubijali, nikakve zakone nismo poštivali. Zatim je ustao i rekao: - Allah nas je poslao da izbavimo robove iz obožavanja robova da bi

obožavali Gospodara robova, da ih izbavimo iz tjeskobe ovog svijeta u bezgranično prostranstvo onog svijeta, ahireta, da prihvate jedini ispravan put, islam.

Draga braćo i cijenjene sestre! Onaj ko želi da jedina ispravna vjera zaživi u njegovoj kući, mora poučiti sebe i svoje ukućane islamu. Uzvišenog Allaha treba stalno veličati i tome podučavati svoju djecu, da izgrade u svojim srcima ljubav spram Allaha, dž.š., da Ga najviše vole i uvažavaju. Kada otpočinjete sa jelom, spomenite svojim ukućanima da su to blagodati od Allaha, dž.š. Podučimo svoju djecu da je Allah Tvorac i Gospodar svega, da jedino On zaslužuje da se obožava, da je Kur'an uputa koju treba učiti, proučavati, slijediti i po njoj se vladati, da je Muhammed, s.a.v.s., najbolji uzor koga treba slijediti, da se u ashabe treba ugledati a ne na pjevače, fudbalere i glumce. Čovjek promišlja o stvarima sa kojima se često susreće. Naše doba karakteriše televizija, internet, radio, različite vrste novina i u većem dijelu negativno utiču na našu mladež. Posvetimo pažnju da se naša djeca što bolje upoznaju sa vrednotama dini islama kako bi ga voljeli, u srcu nosili i po njemu se vladali. Allah je obavijestio generaciju ashaba da je zadovoljan sa njima i da su oni zadovoljni Njime, što nas upućuje da se ugledamo na njih koji su uspješno prošli ovosvjetski život. Naša mladež daleko bolje poznaje živote glumaca, fudbalera i pjevača nego živote ashaba. Zapitajmo se, zar to nije sramota i nedostatak koji trebamo ispraviti?

Molimo Uzvišenog da prosvijetli naša srca iskrenim imanom i da nas izbavi iz tmina neznanja na svjetlo istine i Tevhida. Molimo Allaha da nam istinu pokaže istinom i pomogne nas da je slijedimo, a zabludu da nam pokaže stranputicom i pomogne nas da je se klonimo.

Amin!

UZROČNICI SNAGE U ŽIVOTU MUSLIMANA